



11. april 2017

Nal. nr./j.nr.: 2016-142-0014

All. nr./notatnr.: 48643

Sull./sagsbeh.: FH / jh

Oqaaseqaat pineqartut kikkuussusiinik ilisarnarunnaarlugit 11. april 2017-imi nassiussa.

Tulliuttumi Ombudsmandip suliami oqaaseqaataa saqqummiunneqarpoq (siullermik kommunimut angerlartitsineq pillugu aalajangiisumut oqaaseqaataasimavoq). Suliap ingerlasimanerata allaaserineqarnera oqaaseqaammi innersuutigineqartoq uani ilanngunneqanngilaq.

Suliami pineqartut kikkuussusiinik ilisarnarunnaarsaanermi taaguutit uku atorpeqarsimapput:

P: meerarsiaq

M: meerarsiap anaanavia

A aamma B: angajoqqaarsiat

Kommuni X: kommuni angerlartitsisoqarnissaanik aalajangiisooq

Kommuni Y: angajoqqaarsiaasut kommunigisaat

Illoqarfik XX: Kommuni X-imi illoqarfik

Illoqarfik YY: Kommuni Y-mi illoqarfik

### **Kommunip X-ip P-mik angerlartitsinera**

Meerarsiaminnik P-mik Kommunip X-ip angerlartitsinera A-p aamma B-p allakkatigut 29. februar 2016-imeersutigut ilanngussartalitsigut uannut naammagittaalliuutigaat.

P ...-mi illoqarfimmi XX-imi M-ip panissaaraa. A aamma B-kkut YY-miittut paarsaqarnissamut akuersissummik Kommuni Y-mit 16. februar 2011-mi tunineqarput, P-lu taakkunani inissinneqarluni, meeravissiarineqarnissaa siunertaralugu. Anaanaviusulli M-ip meeravissiangortitsineq peqqissimissutigaa. Kommuni X-ip P tamatuma kingornatigut angajoqqaatut oqartussaassuseqar-toq akuersiteqqaarnagu inissippaa, A aamma B-kkut nalinginnaasumik paarsassaattut. Angajoqqaarsiat P-p pinngitsaaliinikkut meeravissiangortinneqarnissaa tamatuma kingornatigut qinnuteqaatigaat, itigartinneqarlutilli. Inissineq M-ip 11. september 2013-imi akueraa. P tamatuma kingornatigut A aamma B-kkunni nalinginnaasumik paarsarineqartutut inissisimaannarpoq.

P pingasunik ukioqangajalersoq inunngornerata kingornatigut M-ip siullermik attaveqarfigaa.

M-ip P YY-mi angajoqqaarsiaani 2015-imi julimi tikeraarpaa. P-p angerlartinneqarnissaa M-ip tikeraarnermi kingornatigut Kommuni X-imut allakkatigut 20. juli 2015-imeersutigut qinnutigaa. P angajoqqaarsiaminit naammattumik isumagineqarner-soq nalornissutigalugu isumakuluutigigini M-ip tamatumunnga peqatigitillugu oqaatigaa.

Kommuni Y angajoqqaarsiat YY-miittut angerlarsimaffiannut tamanna tunngavigalugu misissuiartorluni 2015-imi septemberimi pulaarpoq. Kommuni nalilivoq pulaarnermi uparuagassaqaangitsoq.

P-p angerlartinneqarnissaa pillugu iliuusissanut pilersaarut Kommuni X-ip 19. oktober 2015-imi suliaaraa. Angerlartitsisoqarnissaa anguniarlugu suliniuteqarnissamik aalajangiisoqarsimanera Kommuni Y-p angajoqqaarsiat angerlarsimaffiannut aqaguani pulaarnermi ilisimatitsissutigaa. P-p M-illu P-p angerlartinneqarnissaata oqilisaavigineqarnissaa siunertaralugu qanoq iliornikkut qaninnerusumik attaveqatigiilersinneqarsinnaanerat pulaarnermi ilaatigut oqaloqatigiissutigineqarpoq.

P kisimiilluni M-imi XX-mi 28. december 2015-imit 8. januar 2016-imut feriasasoq Kommuni Y-p angajoqqaarsianut 21. december 2015-imi paasissutissiisutigaa.

M 28. december 2015-imi illoqarfik YY-liarpoq, P aallugu. Ulloq taanna marluullutik XX-imut uterput. Tamatuma kingornatigut M P-p angajoqqaarsiaanut YY-miittunut 8. januar 2016-imi uternerani ingiaqatigissagaa pilersaarutigineqarpoq.

Kommuni X M-ip saaffiginnissuteqarneratigut M-ip angerlarsimaffianut 5. januar 2016-imi pulaarpoq. P angajoqqaarsiaminit naammattumik isumagineqarnerasoq nalornissutigalugu isumakuluutigigini M-ip oqaatigaa. P-p XX-imi M-imiinnera sivitsorniarlugu Kommuni X aalajangerpoq, Kommuni Y-meersoorlu oqarasuaatikkut iluatsinngitsumik attaveqarfiginiaraluareerlugu e-mailikkut 6. januar 2016-imeersukkut tamatumingga ilisimatillugu. Kommuni Y-p tamanna angajoqqaarsianut 7. januar 2016-imi ilisimatitsissutigaa.

P YY-mi angajoqqaarsiaminut uteqqinngilaq, tassami Kommuni X aalajangiimmat sivitsukkamik feriarnermi M-imut angerlartinneqartoq.

Kommuni X tamatuma kingornatigut 19. januar 2016-imi aalajangiivoq P aamma M piffissami 15. februar 2016-imit 22. februar 2016-imut illoqarfimmut YY-liassasut, P-p angajoqqaarsiani meeqqerivimmiittarfinilu inuulluaqqusinnaaniassammagit. Kommuni X-ip tamanna Kommuni X-imut oqarasuaatikkut 22. januar 2016-imi ataatsimiinnermi ilisimatitsissutigaa. Kommuni Y-p Kommuni X-imi oqarasuaatikkut ataatsimeeqateqarnermi oqaatigineqartunik paatsuineq pissutigalugu angajoqqaarsiat 26. januar 2016-imi ilisimatippai P angajoqqaarsianut uteqqaarallassasoq, angerlartitsinissarlu tamatuma kingornatigut pilersaarusioneqassasoq. P-p angerlartinneqarnissaanik Kommuni X-ip aalajangiinneranik angajoqqaarsianut ilisimatitsissunni Kommuni Y-p 4. februar 2016-imi naqqippaa. P-p angerlartinneqarnerata siuartinneqarnissaanut tunngavilersuunni Kommuni X-ip angajoqqaarsianut 12. februar 2016-imi nammineq aammattaaq ilisimatitsissutigaa.

P-p M-illu 2016-imi februarimi YY-miinneranni Kommuni X-ip, Kommuni Y-p, angajoqqaarsiaasimasut M-illu ullut 14-ikkaarlugit oqarasuaatikkut attaveqatigiittoqartarnissaa isumaqatigiissutigaa, tassanilu A aamma B-kkut P-ilu oqarasuaatikkut oqaloqatigiittarsinnaassallutik.

A aamma B-kkut tamatuma kingornatigut uannut allakkatigut 29. februar 2016-imeersutigut ilanngussartalitsigut naammagittaalliorput. P-p angerlartinneqarnera angerlartitsinerullu meeqqamut pitsaanerususaaq isiginiarnagu kukkusumik pisimanera aappariit taakkua naammagittaalliuutigaa.

Ombudsmandip misissuineranik naammagittaalliuut tunngavigalugu aallartitsiniarlunga aalajangerpunga.

Misissuinerana massakkut naammassivara.

Kommuni X-ip P-p angerlartinneqarnissaanik aalajangiinnginnermini suliamik oqartussaasut paasissutissanik pisariaqartunik pissarsinermikkut naammattunik tunngavissaqarnissaannik piumasaqaat tunngavigalugu naammattunik paasissutissartalersuisimanginnera isorisarialerujussuartut isigaara.

Kommuni X-ip P angerlartinneqassasoq aalajangiinnginnermini meeqqanik inuusuttunillu ikiorsiisarneq pillugu Inatsisartut peqqussutaanni nr. 1-imi, 15. april 2003-meersumi kingusinnerusukkat allannguuteqartinneqarsimasumi (matuma kingornatigut meeqqat inuusuttullu pillugit peqqussummik taaneqartartussami) § 28, imm. 1 tunngavigalugu piumasaqaatigineqartutut tulleriinnersi malillugit angajoqqaarsianik kommunimillu uninngavigisamik oqaaseqaateqartitsisimanginnera taamatuttaarlu isumaginninnermik ingerlatsiviup angerlartitsisoqarnissaanik isumaginninnermi ataatsimiititaliap siulittaasuanut inasuteqaammi taamatut pisussaaffeqarnermik maluginneqqusisimanginnera aamma isorisarialerujussuartut isigaakka.

P-p angerlartinneqassasoq aalajangiinnerminik Kommuni X-ip anaanaviusumut ilisimatitsissuteqarnermi kingornatigut ullut pingasut qaangiunneranni Kom-

muni Y-mut ilisimatitsisimanagera ingerlatsinermi ileqqorissaarnermut naapertuuttutut isigaara.

Kommunilli X-ip ingerlatsinermi ileqqorissaarneq naapertorlugu 22. januar 2016-imi ataatsimiinneq pillugu imaqarniliorsimanninnera ajuusaarnartutut isigaara.

Kommuni X qinnuigaara oqaaseqaatima kommuni sunik isumaliutersuuteqar-nissaanut pissutissaqalersinneraa uannut nalunaarutigeqqullugu, matumani suliat siunissami angerlartitsinernut tunngasut ilanngullugit eqqarsaatigalugit.

Oqaaseqaat manna pineqartut kikkuussusii ilisarnarunnaarsillugit uanga nittar-takkakut saqqummiunneqarumaarpoq, 2017-imilu ukiumoortumik nalunaaru-tinni ilanngunneqarumaarluni.

Suliap ingerlasimaneranik allaaserinninnerup takissusia pissutigalugu taanna i-lanngussatut nassiunneqarpoq. Taamaattumik oqaaseqaammut toqqaannar-tumik nuuppunga.

### **Tamatuma kingornatigut imaattumik oqaaseqaateqarpunga:**

#### 1. Misissuinerma killissalersorneqarnera

A aamma B-kkut meerarsiaminnik Kommuni X-ip angerlartitsinera uannut naammagittaalliuutigaat, matumani kommunip angerlartitsinissamik aalaja-ngiinnginnermi angajoqqaarsiat isumaannik tusarniaasimanninnera kiisalu kommunip angerlartitsinermi meeqqamut pitsaanerusussamik pisariaqarne-ratut annertutigisumik isiginninniarsimanninnera ilanngullugit eqqarsaatigalu-git.

Misissuinerma Kommuni X-ip angajoqqaarsiat eqqarsaatigalugit suliamik sulia-rinninnera inatsiseqartitsineq atuuttoq tunngavigalugu ilumut pisimasutut isigi-sariaqarnerseq apeqquummik misissuineq ilaasussanngorlugu Inatsisartut

Ombudsmandiat pillugu Inatsisartut inatsisaanni nr. 8-mi, 3. december 2009-meersumi § 14, imm. 1 tunngavigalugu killissalerpara.

Oqaatigaara Kommuni X ilaqutariinni paarsassatut inissiinerup unitsinneqarnissaanik P-illu angerlartinneqarnissaanik aalajangiinnginnermini pissutsinik anaanaaviusup atugaanik ilumut misissuisimanersoq isummerfiginngikkiga.

Oqartussaasut paasissutissanik pisariaqartunik pissarsinermikkut naammattumik tunngavissaqartussaananer at aamma ingerlatsinermi oqartussaasup suliamik paasissutissartalersuina pillugu piumasaqaatit tulluuttumi ataatsimut allaase-raakka. Kommuni X-ip P angerlartinneqassasoq aalajangiinnermini suliamik paasissutissartalersuina tamatumunnga uiggiullugu isummerfigaara (immikkoortumi 2-mi). Kommunip meeraq ilaqutariinni paarsatut inissisimajunnaasasoq aalajangiinnginnerani oqaaseqaatinik inatsit tunngavigalugu pissarsini-artarnissaanik piumasaqaat tamatuma kingornatigut iserfigaara. Kommuni X-ip oqaaseqaatinik pissarsiniarsimanginnera tamatumunnga uiggiullugu isummerfigaara (immikkoortumi 3-mi). Angajoqqaarsianik ilisimatitsineq pillugu arlalinnik naatsunik tamatuma kingornatigut oqaaseqaateqarpunga (immikkoortumi 4-mi), suliarlu pillugu naatsumik eqikkaallunga naggasiillunga (immikkoortumi 5-imi).

2. Oqartussaasut paasissutissanik pisariaqartunik tunngavissaqartussaananer at

2.1. Malittarisassatigut tunngavigisaq

Oqartussaasut paasissutissanik pisariaqartunik tunngavissaqartussaananer at ingerlatsineq pillugu inatsiseqartitsinermi tunngavittut inatsisikkut aalajangersagaangitsutut atuuppoq. Oqartussaasup suliami aalajangiinnginnerani paasissutissat oqartussaasup suliami pineqartumi aalajangiinissaanut pisariaqartut pissarsiarinissaat imaluunniit inuit ataasiakkaat/namminersortut, pingaartumik suliami illua'tungiusut suliap paasissutissartalersorneqarnerani taamaalillutillu suliap naammattumik paasissutissartalersorneqarnerani peqataatinneqarnissaat ingerlatsinermi oqartussaasut ataasiakkaat pisussaaffigaat, pisariaqarpat oqartussaasut allat suleqatigalugit. Ingerlatsineq pillugu inatsiseqartitsinermi

aalajangiisuusumik tunngavik taanna oqartussaasut paasissutissanik aalajangiinissaminnut pisariaqartunik pissarsinermikkut naammattunik tunngavissaqartussaanerannik imaluunniit misissuisimasussaataaerneramik taaneqartarpoq.

Namminersorlutik Oqartussat "Suliassat suliarineqartarnerat pillugu inatsit pillugu ilitsersuut"-mi (Kalaallit Nunaanni Namminersornerullutik Oqartussat Inatsisileriffianni 1994-imi decemberimi suliarineqartumi) oqartussaasut paasissutissanik aalajangiinissaminnut pisariaqartunik pissarsinermikkut naammattunik tunngavissaqartussaanerat pillugu oqaatigineqartunit ilaatigut immikkoortumi 198-imit erserpoq suliaq oqartussaasumit pisariaqarnera tamakkerlugu misissuiffigineqassasoq, pisuni ataasiakkaani illersorneqarsinnaasumik aalajangiisoqarsinnaaqullugu.

Paasissutissat suut oqartussaasup suliami eqqortumik aalajangiissaguni pissarsiarissanerai apeqqummi suliaq pineqartoq aalajangiisuussaaq, tak. Karsten Revsbechip allallu atuakkianni "Forvaltningsret – sagsbehandling"-imi 2014-imeersumi quppernerit 145 tulluilu.

Oqartussaasut paasissutissanik aalajangiinissaminnut pisariaqartunik pissarsinermikkut naammattunik tunngavissaqartussaanerisa manna nassataraat, tassalu oqartussaasoq pisussaaffeqartoq ilaatigut oqartussaasup paasissutissanik suliami pineqartumi illersorneqarsinnaasumik aalajangiissaguni pisariaqartunik peqarnissaa qulakkiissallugu, ilaatigullu paasissutissat taakkua eqqortuunerat qulakkiissallugu.

Ingerlatsinermi oqartussaasup paasissutissat pisariaqartut pilertornerpaamik pissusissamisoornerpaanillu/naleqqunnerpaamillu periaaseqarluni pissarsiarineqarnissaat isumagissallugu aammattaaq pisussaaffigaa. Taamaalilluni suliaq oqartussaasumit pisariaqarnera tamakkerlugu misissuiffigineqassaaq, pisuni ataasiakkaani illersorneqarsinnaasumik aalajangiisoqarsinnaaqullugu. Misissuinerup qanoq annertutiginissaanik naliliiniarnermi isiginiagassat arlallit ilaapput. Tigussaasutigut eqqortumik aalajangiinerup anguneqarnissaata isiginiarneqarnerata saniatigut kinguarsaanani aalajangiisoqarnissaata isiginiarneqarnera pingaaruteqartumik inissisimavoq. Pissusiviusoq pingaaruteqartoq nalornissutigi-

neqarpat nalornissutigineqartup taassuma qulaajarniarneqarnera suliap suku-  
miisumik paasissutissartalersorneqarnerani ilaavoq.

Oqartussaasup misissuinermini paasissutissanik sunik pissarsiniartussaanera-  
nik apeqqummi inatsiseqartitsinikkut tunngavigisaq aalajangiinnermi tunngavi-  
gineqartussa q siullertut aalajangiisuusaaq.

## 2.2. Kommuni suliamik paasissutissartalersuina

P-p angerlartinneqarnissaanik inassuteqaat 13. januar 2016-imeersoq Kom-  
muni X-imi isumaginninnermi ataatsimiititaliap siulittaasuata akueraa. Isuma-  
ginninnermi nalunaarusiaq 7. januar 2016-imeersoq inassuteqaammut ilan-  
ngunneqarsimavoq.

Tamanna imatut paasivara Kommuni X-ip angerlartitsinissamik aalajangiinera-  
nut manna tunuliaqutaasoq, tassalu kommunip paasinninnera unaasoq A aam-  
ma B-kkut P-imut angajoqqaarsiatut suliassamik isumaginninnissamut naleq-  
qukkunnaartut. Tamanna aamma imatut paasivara kommunip tamatumunnga  
peqatigitillugu paasinninnera unaasoq pissutsinik P-p angerlarsimaffiup ava-  
taani inissisimaannarnissaanut tunngavilersuutaasinnaasunik M-imi P-imilu pi-  
usoqanngitsoq, matumani pissutsit angerlartitsinerup P-p isumagineqarnissa-  
mik ineriartornissamillu pisariaqartitaanut assortuuttut ulorianaateqarsin-  
naanera ilanngullugit eqqarsaatigalugu.

Angajoqqaarsiat pillugit paasissutissat isumaginninnermi nalunaarusiamit er-  
sertut ilaatigut tassaapput paasissutissat Kommuni X-ip M-imit pissarsiarisima-  
sai. Kommuni paasissutissanik arlalinnik angajoqqaarsiat P pillugu piffissami  
2014-imi oktoberimit 2015-imut ingerlasumi ukiumoortumik nalunaarusiaannit  
aamma pissarsisimavoq.

M-ip oqaaseqaatigisai Kommuni X-imi isumaginninnermik ingerlatsiviup isuma-  
ginninnermi ataatsimiititaliap siulittaasuanut inassuteqaammi 13. januar 2016-  
imeersumi oqaatigisimavai. Taamaaliortoqarsimavoq M-ip angajoqqaarsiat P-i-  
mik isumaginninnerat pillugu isumakuluutigisai soorlu Kommuni Y-p angajoq-



qaarsianut misissuiartorluni pulaarnissaata utaqqimaarneratigut qulaajaqqaarnagit. Taamatuttaa q inassuteqaat isumaginninnermi ingerlatsiviup saqqummiussimavaa, P-p meeqqerivianit paasissutissat Kommuni X-ip e-mailikkut 8. januar 2016-imeersukkut Kommuni Y-imut pissarsiariniaqqusimassai utaqqimaaqqaarnagit. M-ip angajoqqaarsiat P-imut aningaasanik nassuissisannginnerannik oqarsimanera isumaginninnermik ingerlatsiviup isumaginninnermi ataatsimiititaliamut inassuteqaammi 13. januar 2016-imeersumi aammattaaq ilanngullugu oqaatigaa, angajoqqaarsiat P-p anaanaavimminiinnerani aningaasanik nassuissisarnissaannut tunngavissaqarnerseq ingerlatsivik naliliisimangikkaluartoq. Tamatumunnga atatillugu oqaatigaara angajoqqaarsiat meeqqamik paarsaqarnermut atatillugu paaqqinninersiutinik imaluunniit nerisassarsiutis-sanik, kaasarfimmiussanik atisassarsiutissanillu sukkulluunniit tigusaqartarsimanginnerat isumaginninnermik ingerlatsiviup inassuteqaammik suliarinninnermi nalaani ilisimasimagaa.

Paasissutissat ilumuussusiat angerlartitsinissamik inassuteqaatip isumaginninnermi ataatsimiititaliap siulittaasuanut saqqummiunneqannginnerani isumaginninnermik ingerlatsiviup misissorsimangilaa.

P-p angerlartinneqarnissaanik isumaginninnermi ataatsimiititaliap siulittaasua-ta aalajangiinera isumaginninnermi ataatsimiititaliap 11. februar 2016-imi akue-raa.

Kommuni Y-p angajoqqaarsianut misissuiartorluni 8. januar 2016-imi pulaarsi-manera Kommuni X-imi isumaginninnermik ingerlatsiviup piffissami tassani ilisimasimavaa. Tamanna pillugu nalunaarusiaq Kommuni Y-p Kommuni X-imut e-mailikkut 14. januar 2016-imeersukkut nassuissimavaa. Kommuni Y-p nalunaarusiaa M-ip angajoqqaarsiat pillugit naammagittaalliuutaa pillugu oqaaseqaatinik ilaatigut imaqarpoq. Aamma erserpoq nalunaarusiaq 7. januar 2016-imeersooq Kommuni X-imi isumaginninnermi ingerlatsiviup suliarisimasaa "illu-innaasiorpallaartoq", "angerlartitsineq meeqqamut, angajoqqaarsianut anaanaavianullu pitsaanerpaamik angusaqarfiussappat angerlartitsinerup sukumiisumik pilersaarusionerqarnissaa kissaatiginartoq" kiisalu meeraq pillugu paasis-

sutissanik meeqqap meeqqerivianit pissarsiniartoqarnissaata pingaaruteqarne-  
ra Kommuni Y-p oqaatigisimagai.

Taamaalilluni Kommuni Y-p nalunaarusiaa aamma Kommuni X-ip isumaginnin-  
nermi nalunaarusiaa pillugu Kommuni Y-p oqaaseqaatai kiisalu P-p angerlar-  
tinneqarnissaata pilersaarusiorneqarnera Kommuni X-ip ilisimasimavai, paasis-  
sutissalli tamakku P-p angerlartinneqarnissaanik inassuteqaammut atatillugu  
isumaginninnermi ataatsimiititaliamut paasissutissiissutiginagit.

Taamaalilluni Kommuni X-ip suliaq oqartussaasut paasissutissanik aalajangii-  
nissaminut pisariaqartunik pissarsinermikkut naammattunik tunngavissaqar-  
tussaanut tunngavigalugu amigartumik paasissutissartalersorsimavaa.

Tamanna isorisarialerujussuartut isigaara.

### 3. Oqaaseqaatinik pissarsiniarnissamik piumasaqaat

#### 3.1. Meeqqat inuusuttullu pillugit peqqussummi § 28, imm. 1

Meeqqat inuusuttullu pillugit peqqussutikkut aalajangersarneqarpoq angajoq-  
qaarsiat oqaaseqaataat kommunip inissiisup meeraq ilaqutariinni paarsatut i-  
nissinneqarsimanerata taamaatinneqarnissaanik aalajangiinnginnermini pissar-  
siariniassagaa. Meeraq kommunip najugarivitami avataani inissinneqarsimap-  
pat kommunip uninngavigisap oqaaseqaataa kommunip taamatuttaa q pissar-  
siariniassavaa.

Meeqqat inuusuttullu pillugit peqqussummi § 28, imm. 1 imaattunik oqaaser-  
taqarpoq:

“Ilaqutariinni inissiinerup taamaatinnissaa aalajangiunneqartinnagu ilaqutariit paar-  
sisut oqaaseqaateqartinneqassapput. Meeraq kommunerivitami avataani ilaquta-  
riinnut inissinneqarsimappat meeqqap kommuni uninngavigisaa oqaaseqaateqartin-  
neqassaaq.”

Taamaalilluni angajoqqaarsiat kommunillu uninngavigisap oqaaseqaataannik pissarsiniartoqarnissaa inatsisikkut piunasaqaataavoq.

Meeqqat inuusuttullu pillugit peqqussummi § 28 pillugu oqaaseqaatinit makku ilaatigut erserput:

“Meeqqap angerlartinneqannginnerani ilaqtariit paarsisartut aamma ulloq unnuarlu paaqqinniffiup tusarniarneqarnissaannik imm. 1-imi aamma 2-mi aalajangersakkat qularnaarisuussapput. Ilaqtariit paarsisartut/ulloq unnuarlu paaqqinniffik suliamut attuumassuteqartuunngillat taamaattumik tusarniarneqarnissaat qularnaarniarlugu ersarissumik tunngavissaliinissaq pisariaqarpoq.

Ilaqtariit paarsisartut kommunimi allami najugaqartuuppata kommuni taanna aamma tusarniarneqassaaq, taakkua ilaqtariinnut nakkutiginnittuummata taamaattumillu suliami paasissutisseeqataasinnaallutik immaqalu ilaqtariinnit paarsisartunit paasissutissat pissarsiarineqartut eqqortuunerarsinnaallugit/eqqortuunnginnerarsinnaallugit.”

Taamani Ilaqtariinnermut Naalakkersuisoqarfiusup meeqqanik inuusuttunillu ikiorsiisarneq pillugu peqqussut pillugu ilitsersuut december 2001-imeersoq suliarisimavaa. Immikkoortumit 14.4-mit, “Angerlartitsinnginnermi”-mut tunngasumit makku ilaatigut erserput:

“Kommunalbestyrelsi inissiinerni tamani angerlartitsinissaq qaammatinik arfinilinnik sioqqullugu inissiiviusumit (ilaqtariinnit nalinginnaasumik paarsisartunit, ilaqtariinnit inuusutissarsiutigalugu paarsisartunit imaluunniit ulloq unnuarlu paaqqinniffimmit) oqaaseqaammik piniartassaaq, kiisalu angerlartitsinerup ingerlariaqqitsitsinerullu qanoq pinissaat eqqarsaatigalugu iliuusissanut pilersaarut suliarissallugu aaqqiivigissalluguluunniit.

Meeraq inuusuttorluunniit angerlarsimaffiup avataanut ukiut arlerlugit inissinneqarsimappat angerlartitsinissap sapinngisamik qajassuartumik pinissaa isumagineqassaaq.”

Angerlarsimaffiup avataanut inissiineq angajoqqaatut oqartussaassuseqarnermik tigummiartoq akuersisillugu pisimappat angajoqqaatut oqartussaassu-

seqarnermik tigummiartup akuersinini qaqugukkulluunniit tunuartissinnavaa. Kommunalbestyrelsi tamatuma kingornatigut meeraq angerlartinneqassasoq imaluunniit angerlartitsineq meeqqap pisariaqartitaanut ineriartorneranulluunniit assortuuttuuppat angerlartitsisoqassanngitsoq aalajangiissaaq, tak. meeqqat inuusuttullu pillugit peqqussummi § 29.

### 3.2. Kommunip oqaaseqaatinik pissarsiniarsimanginnera

P ilaqutariinni inissinneqarsimanera taamaatinneqassasoq aalajangiinnginnermini angajoqqaarsiat oqaaseqaataat kommunillu uninngavigisap oqaaseqaataa Kommuni X-ip pissarsiariniarsimasussaagaluarpai. Oqaatigaara tamanna isumaginninnermik ingerlatsiviup angerlartitsinissamik isumaginninnermi ataatsimiititaliap siulittaasuanut inassuteqaataani malugeqqullugu oqaatigineqarsimangitsoq.

Siuliani immikkoortumit 3.1-imit ersertutut inatsisiliortut, angajoqqaarsiat meerarsiaq eqqarsaatigalugu suliama illua'tungiusutut inissisimanginnerat innersuussutigalugu, meeqqat inuusuttullu pillugit peqqussummi § 28, imm. 1 akuerisimavaat, kommunip meeqqanik angerlartitsinissaq pillugu aalajangiinnginnerani angajoqqaarsiat tusarniaavigineqartarnissaat qulakkeerniarlugu. Kommuni najugarivitaq kommunip uninngavigisap oqaaseqaataanik pissarsiniarnissaminut pisussaaffeqarpoq, oqaaseqaallu taanna suliamik paasissutis-sartalersuinnermi ilaasussaavoq, tassami kommunu uninngavigisap tassaammat angajoqqaarsianik nakkutilliisuusooq, matumani angajoqqaarsiat suliassaminnik qanoq isumaginninnerannik nakkutilliineq ilanngullugu eqqarsaatigalugu.

Kommuni X-ip angajoqqaarsianit oqaaseqaammik pissarsiniarsimanginnera eqqarsaatigalugu isumaqarpunga angajoqqaarsiat piffissami oktober 2014-imit oktober 2015-imut nalunaarusiaata angajoqqaarsiat oqaaseqaataanik Kommuni X-ip inatsisikkut piunasaqaataasutut pissarsiniarnissamat pisussaaffia taarsersinnaangikkaa.

Kommuni X-ip P-p ilaqutariinni paarsatut inissinneqarsimanerata taamaatinneqarnissaanik aalajangiinnginnermini angajoqqaarsiat kommunillu uninngavigi-

sap, Kommuni Y-p, oqaaseqaataat meeqqat inuusuttullu pillugit peqqussummi § 28, imm. 1 tunngavigalugu pissarsiariniarsimangilai.

Tamanna isorisarialerujussuartut isigaara.

#### 4. Angajoqqaarsianik ilisimatitsineq

Ilaqutariit meeqqamik paarsaqalersinnaanertik sioqqullugu meeqqap pineqartup paarsarinissaanut kommunimit najugarivitaminnit paarsaqarnissamut allakkatigut akuersisummik tunineqarsimassapput, tak. meeqqat inuusuttullu pillugit peqqussummi § 17, imm. 2 aamma imm. 3.

Angajoqqaarsiat sulinerminni atugassaat akissarsiassaallu paarsaqarnissamik kommunimut isumaqatigiissutikkut tamatuma saniatigut aalajangersarneqassapput, tak. meeqqat inuusuttullu pillugit peqqussummi § 21. Paarsaqarnissamik isumaqatigiissummi paarsaqarnermut tunngasut pillugit piumasaqaatit angajoqqaarsiat kommunillu isumaqatigiissutigisimasaat aammattaaq takuneqarsinnaassapput, tak. meeqqanik inuusuttunillu ikiorsiisarneq pillugu nalunaarummi nr. 32-mi, 14. december 2006-imeersumi § 17-imi oqaaseqatigiit siulliit.

Meeraarsiap angerlartinneqassaanik kommunip aalajangiinerata angajoqqaarsianut nalunaarutigineqarnissaa inatsisikkut piumasaqaataangilaq. Tassani aamma ilaavoq angajoqqaarsiat suliami angerlartitsinermit tunngasumi suliami illua'tungiunnginnerat, tamannalu immikkoortumi 3-mi aamma oqaatigineqartut matumunnga tunngaviuvoq, tassalu kommuni ilaqutariinni inissiineq taamaatinneqassasoq aalajangiinnginnermini angajoqqaarsianik immikkut oqaaseqaateqartitsinissaminut inatsisikkut pisussaaffilerneqarsimasoq.

Taamaalilluni kommunip angajoqqaarsiallu isumaqatigissutigisaasa nassatariinnaasaasa saniatigut kommunip angerlartitsinissamik aalajangiinermi angajoqqaarsianut ilisimatitsissutigiginissaanut inatsiseqartitsinikkut pisussaaffeqarneranik piousoqanngilaq.

Uangali paasinninnera unaavoq kommunip angerlartitsinissamik aalajangiinini angajoqqaarsianut ingerlatsinermi ileqqorissaarnej tunngavigalugu sapinngisamillu angerlartitsineq sioqqulluarlugu ilisimatitsissutigisariaqaraa, angajoqqaarsiat tamatumunnga naleqqussarnissaminnut piffissaqartinneqarsinnaaqullugit.

A aamma B-kkut paarsaqarnissamut akuersissummik kommunimit najugarivitaminnit, Kommuni Y-mit, 16. februar 2011-mi tunineqarsimapput. Tamatuma saniatigut angajoqqaarsiat aamma Kommuni Y imaluunniit angajoqqaarsiat aamma Kommuni X paarsaqarnermut tunngasuni piumasaqaataasut pillugit arlaatigut isumaqatigiissuteqarsimanngillat. Taamaalilluni paarsaqarnerup taamaatinneqarnissaanut piffissaliussaq pillugu isumaqatigiissummik suliami peqanngilaq.

Iliusissanut pilersaarutip 19. oktober 2016-imi suliarineqarnerata kingornatigut P-p angerlartinneqarnissaa anguniarlugu Kommuni X sulisimavoq. Tamanna Kommuni Y-p angajoqqaarsianut aqaguani ilisimatitsissutigisimavaa.

P-p anaanaviusullu M-ip qaninnerusumik attaveqatigiinnerat pilersinniarlugu sulinermut ilaatillugu Kommuni X aalajangiivoq P M-imi 28. januar 2015-imit 8. januar 2016-imut feriassasoq. M-illi angajoqqaarsiat P-imik isumaginninnerat pillugu naammagittaalliuutaa pissutigalugu P angajoqqaarsianut pilersaarutaasutut utertussaagaluarluni utinngilaq.

Suliap ingerlasimanerata allaaserineqarnerani takuneqarsinnaasutut P-p angerlartinneqarnissaanik inassuteqaat isumaginninnermi ataatsimiititaliap siulittaasuata 13. januar 2016-imi akueraa. Tamanna isumaginninnermik ingerlatsiviup 19. januar 2016-imi paasivaa. Ulloq taanna Kommuni X-ip anaanaviusooq M sianerfigalugu tamatumunnga ilisimatippaa. Kommuni X-ip suliami ulloq taanna allattuiffianit erserpoq P-p M-imiinnissaa aalajangiusimaneqartoq, P-illu M peqatigalugu angajoqqaarsianik YY-mut inuulluaqqusiartortinneqarnissaanut periarfissaqartoq.

Kommuni X-imi isumaginninnermik ingerlatsiviup Kommuni Y oqarasuaatikkut 22. januar 2016-imi ataatsimeeqateqatigaa, tassanilu Kommuni Y isumagininnermi ataatsimiititaliap siulittaasuata aalajangiineranik ilisimatinneqarpoq.

Kommuni X oqarasuaatikkut ataatsimiinneq taanna 22. januar 2016-imi ingerlanneqartoq pillugu imaqarniliorsimannigilaq. Suliamili allattuiffik suliami allagaatinut Kommuni X-imit tigusannut ilaavoq, taamatuttaarlu ataatsimiinneq pillugu imaqarniliaq naatsoq suliami allattuiffimmit suliami allagaatinut Kommuni Y-mit tigusannut ilaasumit erserpoq. Ataatsimiinneq taanna pillugu imaqarniliaq suliareqqullugu Kommuni Y-p kaammattuutigigaluaraa Kommuni X-ip imaqarniliaq taamaattoq suliarisimannigilaa.

Kommuni X-ip aamma Kommuni Y-p 22. januar 2016-imi ataatsimiinneq pillugu suliani allattuiffiisa imminnut sanilliunneranni takuneqarsinnaavoq Kommuni X-ip ataatsimiinnermi sunik ilisimatitsissuteqarnera kommunit assigiinngitsumik paasisimagaat. Taamaalilluni Kommuni X-ip suliami allattuiffianit erserpoq isumaginninnermi ataatsimiititaliap siulittaasuata angerlartitsinissaq pillugu aalajangiinera innersuussutigalugu siunnersuutigineqartoq P M-ilu peqatigiillutik YY-liassasut angajoqqaarsiat inuulluaqqujartorlugit. P-p angajoqqaarsiat inuulluaqqujartorlugit YY-liarnissaata saniatigut Kommuni Y-p oqarasuaatikkut ataatsimiinneq pillugu suliami allattuiffianit erserpoq P-p YY-mi ulluunerani paaqqinniffimmi inaa ammatinneqassasoq, angerlartitsinerlu paskimut aasamulluunniit pissanersoq naliliisoqassasoq.

Kommuni Y angajoqqaarsianut kommunitut najugarivitaagami tassaavoq Kommuni X-ip aalajangiineranik angajoqqaarsianut ingerlatitseqqilluni ilisimatitsissusaq. Oqarasuaatikkulli ataatsimiinnermi paasissutissat Kommuni X-ip ilisimatitsissutigisaatut saqqummertut Kommuni Y-p paasinninnini tunngavigalugu angajoqqaarsianut ingerlateqqillugit ilisimatitsissutigisimavai.

Taamaattumik angajoqqaarsiat kukkullutik isumaqarsimapput P imminnut utissasoq, angerlartitsinissarlu tamatuma kingornatigut pilersarusiorneqassasoq. Paasinninneq taanna Kommuni Y-p angajoqqaarsianut e-mailiatigut 4. februar 2016-imeersukkut aatsaat naqqinneqarpoq, Kommuni Y-p Kommuni X-imi o-

qarasuaatikkut ulloq taanna ataatsimeeqateqarnerani P-p M peqatigalugu YY-mut 15. februar 2016-imi tikinnissaanik tikeraaginnarnissaanillu ilisimatinnerqarnerata kingornatigut.

P-p angerlartinneqarnissaanik isumaginninnermi ataatsimiititaliap siulittaasua-ta aalajangiinerata kingornatigut ullut pingasut qangiunneranni Kommuni X-ip Kommuni Y-imut ilisimatitsisimanagera ingerlatsinnermi ileqqorissaarnermut naa-pertuuttutut isigaara.

Kommunilli X-ip 22. januar 2016-imi ataatsimiinneq pillugu ingerlatsinnermi ileqqorissaarnerq tunngavigalugu imaqarniliorsimannginnera ajuusaarnartutut isigaara.

Angerlartitsinissamik aalajangiineq Kommuni X-ip Kommuni Y-p Kommuni X-imut kaammattuutigisaatut allakkatigut imaluunniit ataatsimiinneq pillugu ima-qarniliamik nassiussinnermigut nalunaarutigisimasuuppagu Kommuni X-ip P-mik angerlartitsinissaq pillugu aalajangiinera Kommuni Y-p angajoqqaarsianut ingerlaannaq eqqortumillu ilisimatitsissutigisinnaasimassagaluarpa.

## 5. Eqikkaaneq

Kommuni X-ip P-p angerlartinneqarnissaanik aalajangiinnginnermini suliamik oqartussaasut paasissutissanik pisariaqartunik pissarsinnermikkut naammattunik tunngavissaqarnissaannik piumasaqaat tunngavigalugu naammattunik paasissutissartalersuisimannginnera isorisarialerujussuartut isigaara.

Kommuni X-ip P angerlartinneqassasoq aalajangiinnginnermini meeqqat inuusuttullu pillugit peqqussummi § 28, imm. 1 tunngavigalugu piumasaqaatigineqartutut tulleriinneri malillugit angajoqqaarsianik kommunimillu uninngavigisamik oqaaseqaateqartitsisimannginnera taamatuttaarlu isumaginninnermik ingerlatsiviup angerlartitsisoqarnissaanik isumaginninnermi ataatsimiititaliap siulittaasuanut inassuteqaammi taamatut pisussaaffeqarnermik maluginneqqusisimannginnera aamma isorisarialerujussuartut isigaakka.



P-p angerlartinneqassasoq aalajangiinerminik Kommuni X-ip anaanaviusumut ilisimatitsissuteqarnermi kingornatigut ullut pingasut qaangiunneranni Kommuni Y-mut ilisimatitsisimanagera ingerlatsinermi ileqqorissaarnermut naapertuuttutut isigaara.

Kommunilli X-ip ingerlatsinermi ileqqorissaarneq naapertorlugu 22. januar 2016-imi ataatsimiinneq pillugu imaqarniliorsimanginnera ajuusaarnartutut isigaara.

Kommuni X qinnuigaara oqaaseqaatima kommuni sunik isumaliutersuuteqar-nissaanut pissutissaqalersinneraa uannut nalunaarutigeqqullugu, matumani suliat siunissami angerlartitsinernut tunngasut ilanngullugit eqqarsaatigalugit.

Inuulluaqqusillunga

Vera Leth

Assilinera ukununnga nassiunneqarpoq:

- Kommuni Y
- A aamma B